

## **Relatóriu vizita fiskalizonaun ba Munisipiu Manufahi-Same**

### **I. Introdusaun**

Comissão de Saúde, Segurança Sociál e Igualdade de Género halao vizita fiskalizonaun bazeia ba art. 92, art. 95, n.º 3 alínea e), kombinadu ho art. 145 n.º 3) husi Konstituisaun RDTL, no mos bazeia ba art. 35 alínea c), art. 79 alínea f) husi Rejimentu Parlamentu Nasionál.

Vizita ne'e realiza tuir deliberaun Komisaun iha loron 8 abril 2020, no hetan autorizaun husi Prezidente Parlamentu Nasionál datada 18 abril 2020, hodi realiza vizita de fiskalizonaun ba Munisipiu Manufahi, inisia iha 23 abril 2020.

### **II. Objetivu**

Objetivu husi fiskalizonaun ne'e mak atu observa, rekoilla informasaun relasiona ho serbisu Administrasaun Públika, Ezekusaun orsamentu no programa anual 2019, ba iha liña ministerial sira-ne'ebé tutela iha área juridisun Komisaun F no Medidas Prevensaun surtu Covid 19 iha Munisipiu Manufahi.

### **III. Area tematika Komisaun**

Konforme iha aneksu I, Deliberaun Parlamentu Nasionál nú. 2/2018, 27 juñu, hodi konstitui Komisoens Especializadas Permanentes no defini área de kompetensia ba Komisaun F:

- a) Saúde;
- b) Seguransa Sociál;
- c) Labarik sira, terseira idade no sidadaun portadores de defisiensia;

- d) Kombatentes luta ba libertasaun nasional;
- e) Igualdade Jéneru no la diskriminasaun.

#### **IV. Komposisaun Delegasaun**

Membrus Komisaun sira-ne'ebé kompoin iha vizita de-traballu ida ne'e kompostu husi:

1. Dep. Maria Gorumali Barreto (Prezidente Komisaun)
2. Dep. Noé da Silva Ximenes (Vice-Prezidente)
3. Dep. Lusia Taeki (Sekretária)
4. Dep. Antonio Maria Nobre Amaral Tilman (Membru)
5. Dep. Ernesto Fernandes "DUDU" (Membru)
6. Teknika Komisau nain 3
7. Jornalista PN 2

#### **V. Atividades Realizadas**

##### **1. Vizita no halao enkontru ho Administrador Munisipiu Manufahi**

Prezidente no Membrus Komisaun realiza vizita no halao enkontru ho Administrador Munisipiu hanesan mos Prezidente ba *Ekipa Taskforce* ba kontrolu no Prevensaun propagasaun surtu Coronavirus (Covid 19). Iha enkontru ne'e Administrador no Diretora Saúde Munisipal informa ba Membrus delegasaun kona-ba preparasaun no medidas urjentes hodi hatan ba surtu Covid 19 hanesan tuir mai:

##### **Administrador**

- Administrador no Prezidente munisipiu sira hotu halao enkontru iha Nasionál hodi fahe infórmasaun kona-ba COVID-19. Depois de enkontru hotu fila ba idak-idak nia munisipiu hodi hahu forma equipa *taskforce* hodi hare kona-ba COVID-19.
- Iha nível munisipiu, Equipa *Taskforce* sira nia atividade mak halo avizu ba Komunidade, fahe brosuras ne'ebé mak iha ligasaun ba prevensaun COVID-19. Avizu sira ne'e mos la sees husi SOP ne'ebé mak husi WHO nian. Alein de equipa *Taskforce* ne'e, halao mos identifika fatin karantina, ida mak oferece husi Servisu Saúde Munisipiu Polo.
- Equipa *Taskforce* kompostu husi Pessoal Saúde, Parseiru Movimentu Voluntáriu sira hamutuk ho Media sira hodi halo sosializasaun ba Komunidade, alein de ne'e mos rega dezinfektan ba fatin pública sira hanesan: Edifisiu Pública no Merkadu, inklui halo triazen ba Komunidade sira ne'ebé mak konsulta iha Sentru Saúde.

- Relasiona ho Estadu Emergência, regras ne'ebé fó sai no Komisaun halo avizu ba Komuidade sira atu kumpri medidas prevensaun hanesan tenki uza maskara no rega desinfektante. Nune'e mos husi parte munisipiu emite Sirkular ida hodi fó orientasaun ba Administrador Postu sira no orienta Xefe Suco hapara atividades ne'ebé maka halibur ema barak liu-liu seremonia ritual no sau batar.
- Tuir orientasaun Vice-Ministru no Sekretáriu Estadu Arte no Kultura, kada munisipiu tenki halo seremonia ritual hodi hamulak, atu satan netik moras COVID-19. No Komisaun sei kontinua halo sosializasaun ba Komuidade.
- Komisaun kontinua halo instalasaun ba facilidade fase liman nian, hanesan iha Hospital no Merkadu. Estabelese mos fatin karantina tanba hare ba número COVID-19 ne'ebé mak aumenta. Ho razaun ida ne'e maka estabelese tan fatin karantina, se karik iha Díli fatin karantina la suficiente atu akumula ema barak.
- Iha Munisipiu mos prepara ona kondisoens hodi bele facilita no estabelese fatin konferénsia *pers* ba nível munisipiu no sei kria fatin desinfektan 2 hanesan: Leusati no Simpantiga.
- Husi parte Governu hahu halo ona atualizasaun dados ba Uma Kain ida-idak ne'ebé mak agora dau-daun Administrador Postu, Xefe Suco no Xefe Aldeia sira halo.
- Parte Munisipiu hanoin atu estabelese Sentru hanesan Posko ida ne'ebé mak sei envolve Grupu Voluntáriu sira husi ita nia parseiru para atu bele husu ajuda husi maluk sira. Apoiu sira ne'ebé mak mai hanesan maskara no osan hodi sosa ai-han ruma. Iha ema voluntáriu ruma iha osan hakarak kontribui karik bele lori ba tau iha Posko hodi bele ajuda ba Komuidade sira ne'ebé mak prezisa. Estabelesimentu Posko hirak ne'e sei lokaliza iha Same, Alas, Fatuberlihu, Dotik no Turiscaí.
- Iha Munisipiu Manufahi ema ne'ebé mak karantina iha nain 7. Além de ne'e mos simu ema 15 husi Díli. Sira ne'ebé mak remata lora karantina no reintegra ona ba iha sira nia família.
- Iha ema nain 2 maka fóin lalais ne'e hetan duni sintoma no doutor sira halo fali observaun lori hikak mai karantina hodi halo teste no rezultadu negativu.
- Hatan ba apoiu Profissional saúde ne'ebé limitadu tebes, karik moras ne'e akontese to'o ema mate ne'e rekursu la suficiente hodi atende. Nune'e mak fórma fali Equipa Voluntáriu no sei hetan orientasaun direta husi Presidente Equipa *taskforce* nian.
- Equipa Voluntáriu Móvel kompostu husi membru KPK, Jovem sira, Funsionáriu, CVTL, paseiru desenvolvimentu. Voluntáriu sira ne'e mak hola parte iha equipa refere.
- Além de ida ne'e mos equipa prepara ona fatin Simitériu karik kazu COVID 19 resulta ema mate. Tanba husi nasional mos preparadu ona, no munisipiu mos hanesan. Ba assuntu ida ne'e prepara ona ema nain 6 hodi servisu iha Simitériu. No Governu mak prepara hotu no hato'o ona ba Diretora Solidariedade Sosial atu apoiu Ambulância propriu ida hodi tula mate ne'ebé mak afeta husi COVID 19.
- Pessoal sira iha liña frente ba COVID 19 maka hanesan, Medikus no Enfermirus, hamutuk ema nain 8. Ema hirak ne'e mak tuir fórmasaun iha Díli kona-ba

atendimentu ba moras COVID, além de ne'e inklui mos Pessoal Saúde sira hotu, PNTL no F-FDTL.

- Ba sira ne'ebé mak tama iha karantina, durante ne'e hetan ai-han husi Kompañia no inklui mos Pessoal Saúde sira ne'ebé maka fó apoiu ba sira iha karantina.
- Orariu ba funsionáriu públiku durante Estadu Emerjensia. Iha orariu rotativu ba sira iha parte dader no loraik. No hahu husi Administrador no Xefia sira tama servisu hanesan normal.
- Kazu dengue. Iha Munisipiu Manufahi ho tempu udan moras dengue afeta ema nain 6 no hetan baixa, tuir informasaun husi Pessoal Saúde sira katak aimoruk ba fomigasaun la suficiente.
- Prevensaun covid-19. Apoiu voluntáriu husi Parseiru: Luta ba Futuru, Mercy Corp, CVTL, TAF fó apoiu ekipamentus protesaun ba Equipa Taskforce hodi halo atividade.
- Rekoperasaun ekonomiku. Husi parte Ministério Administrasaun Estatal, Administrador fó ona orientasaun ba Administrador Postu no Xefe de suku sira hahu halo atualizasaun dados ba Uma Kain nasionál.
- Durante implementasaun Estadu Emergência, bazeia ba observasaun ne'ebé mak iha, liu-liu hare ba Komunidade sira ne'ebé halao negosiu. Tanba barak liu halo kreditu iha banku hodi halo negosiu. Komunidade sira nia preokupasaun mak durante implementasaun Estadu Emergência sira nia atividade hotu paradu. Autoridade husi Banku husu Kreditur sira tenki selu osan funan ka jurus. Problema mak ne'e, sira la iha osan hodi selu. Karik ba oin mak estende tan Estadu Emergência tenki hadia mos mekanizmu balu hanesan labele hatodan fali Komunidade sira nia ekonomia.

## **2. Servisu Saúde Munisipal, Diretora relata ba Komisaun:**

- Rekursu Umanu. Pessoal Saúde hamutuk ema 29. Iha munisipiu Manufahi iha Mediku 2 no sira nia servisu tenki kontrola to'o Sentru Saúde sira hotu. Iha Same villa liu-liu iha sala Internamentu iha mediku nain 4. Enfermeirus hamutuk 27 no Parteiras iha 25.
- Iha futuro Servisu Saúde munisipiu presiza tan voluntáriu tanba rekursus humanus la suficiente. Agora daudaun iha voluntáriu nain 4 (akaba ona estudo), ne'ebé destaka iha Internamentu no Maternidade.
- Iha inísiu fevereiru husi Diretóra fó orientasaun kona-ba oinsa atu atende COVID 19, halo mos sosializasaun iha Postu de Saúde no fatin SISCA.
- Kona-ba ekipamentus ba Pessoal Saúde hodi atende ema sira ne'ebé iha karantina hanesan maskara, luvas no desinfektante hodi prevene moras Covid. Husi nasional fó deit Ekipamentus Protesaun Pessoal-PPI hamutuk 10.
- Medikamentus ka aimoruk hanesan paracetamol no sira seluk suficiente.
- Servisu Saúde realiza ona fatin triazen hodi fo atendimentu ba pasiente sira-ne'ebé mak halo tratamento iha Sentru Saúde.
- Aimoruk rega susuk iha la suficiente. Tanba ne'e mak rega deit ba fatin sira-ne'eb'e afetadu.

- Proposta Orsamentu kona-ba COVID 19, hatama ona ba Nasionál ho montante US\$12,350,00. Husi orsamentu ne'e hodi sosa dezinfektan, kapa udan, kobre mos Voluntáriu sira nia hahan.
- Orsamentu DOT. Alokasaun orsamentu husi fulan fevereiru to'o abril 2020, Servisu Saúde Munisipiu maibé to'o agora la hetan.

### **3. Vizita Sentru Saúde Manufahi**

Komisaun kontinua halo vizita observasaun ba iha Sentru Saúde Munisipal hodi hare direktamente atendimentu Profisional Saúde ba Komunidade ne'ebé halao konsulta. Alén de ne'e observa mos servisu Administrasaun no fatin Karantina ne'ebé destinadu ba paciente Covid-19. Tuir Komisaun ninia observasaun hatudu katak servisu administrasaun no atendimentu ba paciente lao normal. Maibé antes situasaun Covid paciente barak kompara ho situasaun estadu emergencia paciente menus tambá tauk no falta transporte.

### **4. Vizita Sala Internamentu.**

Komisaun kontinua halao vizita ba sala Internamentu hodi hare kondisoens ba paciente sira ne'ebé baixa. Durante observasaun hatudu katak iha paciente TB, diaria no paciente sira seluk ho moras respiratóriu ne'ebé a'as. Ekipamentus Medikus *bem* preparadu no sanitasaun diak.

### **5. Vizita fatin Karantina**

Husi parte seluk, Komisaun kontinua ba vizita fatin karantina. Bazeia ba observasaun hatudu katak, Edifisiu ninia distansia la dook husi Sentru Saúde inklui distansimentu entre Pessoal Saúde ho paciente sira. Edifisiu ne'e lokaliza iha Komunidade sira nia hela fatin ida-ne'e bele fo impaktu ba pacientes halao konsulta inklui Komunidade sira ne'ebé hela besik.

### **6. Vizita Sala Maternidade**

Presidente Komisaun ho Komitiva kontinua halao observasaun ba Sala Maternidade hodi hare kondisoens Inan Partus no, Bebe sira, observa mos ekipamentus no material sira ne'ebé uza iha sala refere. Iha observasaun ne'e hatudu katak antes implementasaun Estadu Emejensia iha Inan Partus barak maibé durante implementasaun Estadu Emergencia menus (semana ida bele iha paciente 2 deit). Iha kazu ida, Inan ne'ebé refere husi Postu Saúde Oelaluhu, partus hetan dificuldade transporte no la konsege salva Bebe). Kona-ba ekipamentus diak hotu.

## **7. Vizita Armazen Medikamentus**

Iha loron hanesan Membrus Komisaun ba fiscaliza no observa Armazen Medikamentus. Komisaun nota katak kondisaun Armazen ne'ebé uza hodi rai aimoruk la seguru hodi konserva Medikamentus no ameasa kuandu iha tempu udan. Tanba la iha valeta ne'ebé atu kanaliza Bee no proteze Edifisiu husi inundasaun kuandu udan bo'ot. Tuir informasaun husi Responsavel Saúde katak wainhira tempu udan be'e tama kedas ba armazen.

Iha sorin seluk, Komisaun identifica katak

## **8. Vizita Postu Saúde Simpan Tiga**

Komisaun kontinua ba halo vizita traballu iha Postu Saúde Simpan Tiga, Suku Daisua, Objetivu husi vizita ne'e maka atu fiscaliza no observa prestasaun servisu Profisional Saúde ba iha Komunidade inklui implemntasaun programa saúde. Responsavel Profisionál Saúde iha Postu refere esklarese ba Komisaun F katak, iha Postu ne'e servisu lao ho diak. Iha Postu ne'e laos halao atendimentu deit ba Komunidade iha Suku ne'e maibé atende mos paciente sira-ne'ebé mai husi Suku Beikala, Postu Administrativu Hato-Udo, Munisipiu Ainaro.

Liga ho Inan Partus, Pessoal Saúde la halo atendimentu ba Inan Partus iha Postu tanba falta de ekipamentus.

## **VI. Konklusaun**

Durante halao vizita de fiskliazasaun, iha observasaun Komisaun F halo konklusaun hanesan tuir mai:

1. Prevensaun Covid 19. Autoridade Munisipiu Manufahi no servisu hamutuk ho Entidades relevantes halao sensibilizasaun no prevensaun ba surtu Covid-19 ho atividades mak hanesan: fase liman lor-loron, uza maskara, hapara temporariamente seremonia cultural, hapara movimetu transporte públiku, halao vijilansia no rega dezinfektan ba transporte privada, taka stiker kona-ba medidas prevensaun husi OMS no hapara atividades sosiál sira-seluk.
2. Timor oan sira-ne'ebe hetan karatina iha Munisipiu Manufahi hamutuk ema nain 22 inklui nain 15 husi Díli, sira ne'e hotu reintegra tiha ona ba família.
3. Ekipamentus Protesaun Pesoad. Seidauk iha distribuisaun ekipamentus ba Profissionais Saúde sira-ne'ebé destaka iha liña frente, maibé sira ho konsiensa

kontribui orsamentu hodi sosa materiál protesaun hanesan *Jas hujan (kapa Udan)* no luvas.

4. Orsamentu. Husi Ministériu kompetente sei-dauk aloka orsamentu husi fundu Covid-19 ba Munisipiu hodi halo kobertura ba despezas ne'ebé liga ho kombate surtu corona vírus.
5. Liga ho rekursu Umanu iha Munisipiu Manufahi Pessoal Saúde iha número limitadu tebes atu atende Komuidade wainhira surtu Covid-19 afeta populasoun.
6. Servisu Administrasaun no atendimentu Profissionais Saúde. Tuir Komisaun ninia observaun katak Servisu Saúde Munisipal, Sentru Saúde no Postu Saúde halao servisu ho diak mezmu ke iha limitasaun rekursu material no apoiu transporte.
7. Implementasaun Programa Saúde. Bazeia ba Komisaun nia fiskalizaun no observaun nota katak iha programa saúde balun la implementa tanba implementasaun Estadu de-Emerjensia liga ho pandemia Covid-19.
8. Medikamentus. Iha fiskalizaun husi Komisaun hare katak iha item balu husi aimoruk mak liu prazu ona. No armazen ne'ebé rai aimoruk la seguru atu konserva no proteje Medikamentus tanba hetan ameasa husi inundasaun wainhira tempu udan.

## **VII. Rekomendasaun**

Bazeia ba informasaun sira-ne'ebé relata husi Autoridade Munisipiu no observaun husi Komisaun hato'o rekomendasaun hanesan tuir mai ne'e:

### **Ba Ministériu Saúde**

- Rekomenda ba Ministériu Saúde atu fasilita Ekipamentus Mediku no Ekipamentus Protesaun Pessoal ba Profissionais Saúde iha Munisipiu hodi luta hasoru Covid-19.
- Rekomenda ba Ministériu no Entidades relevantes atu prosesa pagamentu ba Pessoal Saúde sira-ne'ebé servisu iha liña frente.
- Rekomenda ba Ministériu Saúde hato'o monitorizasaun no rejistu regular kona-ba pedidu distribuisaun Medikamentus ba Hospital, Sentru no Postu Saúde sira.
- Rekomenda ba Ministériu Saúde no Servisu Saúde Munisipal atu halo manutensaun regular ba Ekipamentus Mediku no transporte, Ambulansia no

kareta Multi Fusaun hodi bele fasilita servisu no implementasaun Programas Saúde iha Munisipiu.

- Rekomenda ba Ministériu Saúde ho koordinasaun Servisu Saúde Munisipal hodi identifika forsa traballu Profissionais Saúde hodi bele reforsa servisu iha Sentru no Postu Saúde sira.
- Rekomenda ba Ministériu Saúde no Servisu Munisipal Saúde atu propoin iha orsamentu kona-ba konstrusaun valeta ka Bee dalan iha Armazen Aimoruk Manufahi hodi proteze Armazen husi inundasaun.
- Rekomenda ba Ministériu Saúde atu hare kondisoens residencia ba Medikus no Pessoal Saúde iha nível Sentru Saúde no Postu Saúde iha área remotas.
- Rekomenda ba MS no Servisu Saúde Munisipal atu halo kontrolu ba prestasaun servisu pessoal farmasia iha Sentru no Postu Saúde sira inklui Pessoal servisu iha Armazen hodi halo rejista ka rekapitulasiun regular ba *intem* aimoruk.

#### **Ministériu Obras Públikas**

- Rekomenda ba MdS ho kordenasaun Ministériu Obras Públikas atu hato'o proposta orsamentu hodi hadia estrada ne'ebé liga Oelaluhu ho Munispiu Manufahi atu fasilita pasiente sira halo tratamentu.

#### **VII. Aprovasaun Relatóriu**

Relatóriu vizita ne'e hetan apresiasaun no aprova iha sede Komisaun, lora 2 jullu 2020, ho votus a favor 7 kontra 0 no abstensaun 0.

**Prezidente Komisaun,**

**Relátora,**

Noé da Silva Ximenes "Buka Tuir"

Helena Matins Belo